

Odluka o imenovanju međunarodnog sudije u Sud Bosne i Hercegovine

Koristeći se ovlaštenjima koja su Visokom predstavniku data u članu V Aneksa 10. (Sporazum o implementaciji civilnog dijela Mirovnog ugovora) Općeg okvirnog sporazuma za mir u Bosni i Hercegovini, prema kojem je Visoki predstavnik konačni autoritet u zemlji za tumačenje gore navedenog Sporazuma o implementaciji civilnog dijela Mirovnog ugovora; i posebno uzevši u obzir član II 1. (d) istog Sporazuma prema kojem Visoki predstavnik "pomaže, kada ocijeni da je to neophodno, u rješavanju svih problema koji se pojave u vezi sa implementacijom civilnog dijela Mirovnog ugovora";

Pozivajući se na stav XI. 2 Zaključaka sa Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru Visokog predstavnika da iskoristi svoj konačni autoritet u zemlji u vezi sa tumačenjem Sporazuma o implementaciji civilnog dijela Mirovnog ugovora, kako bi pomogao u iznalaženju rješenja za probleme u skladu sa gore navedenim "donošenjem obavezujućih odluka, kada ocijeni da je to neophodno", o određenim pitanjima, uključujući i (prema tački (c) stava XI.2) "mjere kojima se osigurava implementacija Mirovnog sporazuma na cijeloj teritoriji Bosne i Hercegovine i njenih entiteta";

S obzirom na stav 12. 1 Deklaracije Vijeća za implementaciju mira sa sastanka održanog u Madridu 15. i 16. decembra 1998. godine u kojem je jasno rečeno da Vijeće smatra da je uspostava pravne države, u koju svi građani imaju povjerenja, preduvjet za trajni mir te za samoodrživu ekonomiju koja može da privuče i zadrži i strane i domaće ulagače;

S obzirom i na stav 3. Aneksa II (Vladavina zakona i ljudska prava) pomenute Deklaracije prema kojem uspostava sudskih institucija na državnom nivou, koje zadovoljavaju Ustavom utvrđenu potrebu za procesuiranjem krivičnih djela koja su počinili javni zvaničnici Bosne i Hercegovine u toku obavljanja službene dužnosti, kao i upravnih i izbornih pitanja, predstavlja preduvjet za uspostavu vladavine prava u Bosni i Hercegovini;

Pozivajući se na Deklaraciju Vijeća za implementaciju mira, sa sastanka održanog u Briselu 23. i 24. maja 2000. godine, i Aneks iste, u skladu sa kojima je usvajanje Zakona o Sudu Bosne i Hercegovine predviđeno do septembra 2000. godine;

Imajući na umu osnaženu strategiju reforme pravosuđa u cilju jačanja napora za uspostavu vladavine prava u Bosni i Hercegovini tokom 2002./2003. godine koju je podržao Upravni odbor Vijeća za implementaciju mira na sastanku održanom 28. februara 2002. godine, i konstatirajući da je pomenuta strategija osmišljena kao odgovor na zahtjeve organa vlasti u Bosni i Hercegovini za odlučnijim angažmanom međunarodne zajednice po pitanju privrednog kriminala, korupcije i problema sa kojima se suočava pravosudni sistem;

Konstatirajući takođe i činjenicu da se u kominikeu koji je Upravni odbor Vijeća za implementaciju mira donio u Sarajevu 31. jula 2002. godine navodi da Odbor pozdravlja osnivanje posebnih vijeća Suda Bosne i Hercegovine i podržava prijedlog Visokog predstavnika da uključi domaće i međunarodne sudije i tužioce u sastav posebnih vijeća/odjela za organizovani kriminal, privredni kriminal i korupciju u sklopu Suda Bosne i Hercegovine i Tužilaštva Bosne i Hercegovine ;

Imajući na umu da kriminal i dalje ugrožava demokratska, ekonomska, fiskalna, tržišna i druga socijalna prava i interese građana Bosne i Hercegovine, te da će osnivanje posebnih vijeća za organizovani kriminal, privredni kriminal i korupciju u sklopu prethodno pomenutog Suda Bosne i

Hercegovine i Posebnog odjela Tužilaštva Bosne i Hercegovine dati doprinos odlučnoj i efikasnoj borbi protiv kriminala u Bosni i Hercegovini;

Uvjeran da je za Bosnu i Hercegovinu od suštinskog značaja da se osigura jačanje i poštivanje vladavine prava kako bi se stvorila osnova za privredni rast i strana ulaganja;

Imajući stoga na umu kako hitnost tako i potrebu da se uspostave posebna vijeća i Posebni odjel za organizovani kriminal, privredni kriminal i korupciju u sklopu Suda Bosne i Hercegovine i Tužilaštva Bosne i Hercegovine, te da se imenuju međunarodne sudije i tužioci u Sud Bosne i Hercegovine i Tužilaštvo Bosne i Hercegovine, te iz svih gore navedenih razloga,

Visoki predstavnik ovim donosi sljedeću:

O D L U K U

o imenovanju međunarodnog sudije u Sud Bosne i Hercegovine

1. U skladu sa izmijenjenim i dopunjenim članom 65. stav 1. Zakona o Sudu Bosne i Hercegovine "Službeni glasnik Bosne i Hercegovine", 29/00, 24/02, 3/03, 37/03, 4/4 i 9/04 (u daljem tekstu: Zakon), dole navedena osoba se ovom Odlukom imenuje na funkciju međunarodnog sudije u Posebnom vijeću za organizovani kriminal, privredni kriminal i korupciju u sklopu i Krivičnog odjela i Apelacionog odjela Suda Bosne i Hercegovine:

Robert G. Ulrich

2. Međunarodni sudija se u prvom mandatu imenuje na period od dvije godine, a može se ponovno imenovati u skladu sa Zakonom. U slučaju podnošenja ostavke ili spriječenosti međunarodnog sudije ili tužioca da na svom položaju ostane do isteka mandata, Visoki predstavnik će imenovati drugu osobu koja će na toj funkciji ostati do kraja tog mandata.

3. Imenovanje obavljeno u skladu sa ovom Odlukom stupa na

snagu 22. juna 2004. godine.

4. Ova Odluka stupa na snagu odmah i objavljuje se odmah u "Službenom glasniku Bosne i Hercegovine".

Sarajevo , 22. juna 2004. god.

Paddy Ashdown

Visoki predstavnik